ورازة النعامه

المنتة العامة لقصور التقافة

Limit in A to the set of the state of th And A Mark Roy Mark to the second of the sec 414161 L9 3.2.20 الغيل و a lang like and a lang stand were and a grant of the same of the s

عترر العامية القاهرية القاهرية

Liking the company of the contract of the cont A STATE OF THE STA

عمروحسني

تقرير الشهيد ألفين وحداشر

أشعار بالعامية القاهرية





رئيس مجلس الإدارة سعد عبد الرحمن أمين عام النشر محمد أبو المجد الإشراف العام صبحى موسى الإشراف الفنى الاشراف الفنى د. خالد سرور

إبداعات الثورة

* تقرير الشهيد ألفين وحداشر

* عمرو حسني

* الطبعة الأولى

الهيئة العامة لقصور الثقافة القاهرة - 2012م 13.5 × 13.5 سم

* تصميم الغلاف: عماد عبد الغنى المراجعة اللغوية: حسين جعفر

* رقم الإيداع: ٢٠١٢/١٩٩٤

* الترقيم الدولي :

978-977-718-117-4

* المراسلات :

باسم مدير إدارة النشر 16 أشارع أمين سامى قصر العينى القاهرة - رقم بريدى 11561 ت: 7947891 (داخلي180)

الجمع والإخراج:

وحدة التجهيزات الفنية الإدارة العامة للنشر

الطباعة:

شركة الأمل للطباعة والنشر ت: 23904096

* الآراء الواردة في هذا الكتاب لا تعبر بالضرورة عن توجه الهيئة بل تعبر عن رأى المؤلف وتوجهه في المقام الأول.

* حقوق النشر والطباعة محفوظة للهيئة العامة لقصور الثقافة.

* يحظر إعادة النشر أو النسخ أو الاقتباس بأية صورة إلا بإذن كتابي من الهيئة العامة لقصور الثقافة، أو بالإشارة إلى المصدر

تقرير الشهيد ألفين وحداشر

إهداء في رسالة

الأحباء خالد سعيد، ومينا دانيال، وباقبي رفاقها الشهداء حاولت الرد بلا جدوى على بريدكم الإلكتروني الرقيق الذي أتاني من المجنة مرسلاً من العنوان: Noreply@heaven.com

عبروحسني

تقرير الأديب الشرعى للشهيد ألفين وحداشر

المتوفى ألفين وحداشر لما نقلوه للمستشفى الميداني على الموتوسيكل الصيني تقليد الياباني من شارع القصر العيني كان لسد فيد الروح مع إنه كان مدروز طلقات مطاطى وخرطوش كان بيخرف ويقول: إسمى ألفين وحداشر وما ينفعش أموت دلوقتي قبل ما اسلم أوراقي لأخويا ألفين واتناشر! الدكتورة ابتسمت في وشد حزينة وقالت: ألفين وحداشر دا مش إسمك يا ابنى دا رقمك في كشف الجرحي! هو انت اسمك إيه ف بطاقة الرقم القومى؟ ألفين وحداشر غمض عينه وقال: اسمى عام الأمل المسروق أو عام الفرح اللى قتلوه مخنوق بقنابل غاز تاريخ صلاحيتها عدى وفات مش بالذمه دى نكته يا حضرات؟! قال يعنى لو لسه تاريخ صلاحيتها ما عداش حتكون صالحه لاستهلاك البنى آدمين؟ ومفيده زى الجبنه الرومى والفيتامين؟! وقعد ألفين وحداشر يضحك زى المجانين الدكتوره مسكت إيده وقالت: أرجوك ريّح نفسك وما تتكلمش أرجوك ريّح نفسك وما تتكلمش وقعدت على رصيف الجامع فى وش عمر مكرم وباقول:

باى باى ألفين وحداشر مع ألف سلامه يا أنبل عام إنت عملت اللى عليك وزياده بصراحه مش ذنبك إن الأحلام خزقوا عيونها برصاص مطاطى وداسوها تحت بياده وهرسوها بدبابة جيش

مش ذنبك إن اللى معلق على كتفه دبابير كان داير يقرص بيها ضمير وقلوب الناس اللى بتطلب حرية وعيش لكن قبل ما تلفظ آخر أنفاسك خلينى أعد جروحك وطلقات الخرطوش والمطاطى اللى ساكنين روحك علشان أكتبها على صفحات التقرير الموجود قدامى بقلم أحمر دامى أنا دكتور الطب الشرعى الأدباتى...

اللى مش زى التانى السبعاوى الحاتى.. اللى بيشوى جثه بحالها وياكلها ف نص رغيف! يمكن لما يبجى أخوك ألفين واتناشر يستلم الجثه منى ف المشرحه وسط المتاعيس يصعب حالى عليه.. ويقرر يبقى آخر أحزانى ويحققلى ف أسابيعه الجايه آمال وأمانى بدل الأحلام.. اللى اتقلبت كوابيس

التقرير:

(1) ضربة سيف ف الراس

من تحت باط الغول رمحت جمال وخيول ف الصوره بُص وشوف الفاعل المعروف أبو سنج وسيوف وقزايز المولوتوف تلاقيه ف كل حريق وشه بجح مكشوف وف دفتر التحقيق وف دفتر التحقيق والقاضى.. مش مكسوف!

(2) رشّات خرطوش

في أنحاء متفرقة من الجسد لما اتفتح المحضر ف التحقيق يا شاطر الجاني كان أشطر! رتب ڪل دفاعه ومحامى الشهداء كان ورقه متبعتر القاضى متحير قال كاميرات المتحف بايظه ومش بتصور! وجابولنا سيديهات بايخه ودمها يلطش فيها فيلم عريس من جهات أمنيه وطباخ الرئيس اللي اسمه زكريا

اللى شاف ئوار جد ومش بهزار ف خياله المتداعي بينضربوا بالنار ويمارسوا جنس جماعي! ومش شايفين بعيونهم من كتر التحشيش مع إنها عميانة من طلق الخراطيش! وجيوبهم مليانه عمولات على بقاشيش المشكله مش عنده لكن فيا وفيك يومها العجل اتكعبل وبدل ما يقول يا فكيك جابلك غول مستهبل

قال إيد؟ راح يحميك يضرب للشهداء سلامات المماليك وانت بطيبة قلبك سيبته عليك يستعبط تتمرجح في شنبه وف رجليه تتشعبط تتصور للذكري بس ما خدتش بالك الغول المستأنس وهم وعاش ف خيالك مع إنك ف الماضى ياما قريت حواديته وياما صرخت ف حضنه من قرصات براغیته! معقول تنسى إنه بعد ما ياكل لحمك حيحلى بعيالك؟!

نهايته.. قصر الكلام الراجل اللي نام يلعب ف مناخيره ما جاش ف باله أبدأ يصحى ف ضميره عياله بيخبوه وهو مستموت على سريره حضر لنا شمهورش الفوضى وطلقه ف بلادنا صرخنا من غلبنا: دَستور يا أسيادنا! قالوا لنا دُستور الأ الأول استفتاء! على الألف والباء مين فيهم الأول؟! جاوبنا: طبعاً ألف الغول شخط فينا وقال: أنا مختلف! والشيخ نهرنا وجرجرنا على استحياء واحنا من الفرحه زغرطنا واتلقعنا بالطرحه وبصمنا بالعشره بكل غباء إن الألف ترتيبها بعد الباء!

(3) جرح غائر في الكرامة

قیس بن الملوّح
علی عینك یا تاجر
فی عصر الجاهلیه
بالشعر كان بیصرّح
بحبه لبنت عمه لیلی العامریه
ودی علی أیامهم تعتبر تهمه وفضیحه مدویّه
لكن أبوها ما أخضعهاش لكشف، عذریة
لأنه كان راجل حمش ولكن مش عدیم المفهومیه
قال عادی إن الشعرا یغنوا للهوی العُذری
دلوقتی بعد ألف وربعمیت سنه..
إیه أنا عذری؟
غیر إنی عایش معاكم فی زمن مزری
فیه بنات بلادی

اللي بحب الوطن بتنادي العسكرى يجرهم من شعرهم بقرف وكأنهم بيفرطوا ف الشرف ودا منطق استعبادي فيه خسه واستهبال لعقول حميري شنباتها ميرى لكن لابسها عيال علشان كدا نقدر نقول ببساطه: وضاعة الأعمال فضت بكارة رجال واقفين بكل ألاطة مع إنهم محتاجين لنخوه ولحريه ولكشف يثبت إنهم على بلاطه

فاقدى العذريد!

صوت ميكروفون ملعلع خارج المشرحة

قرب قرب قرب مولد انتخابات فرقع بهب وجرب دی لعبة حسابات بلالین اختبار وحلل فوق النار فیها طبیخ راح یجهز لسه ناقصه بهار قرب قرب قرب مولد انتخابات

ما تشغلش بالك ولا تتعبش خيالك كوتشينه مسحوره ناقصها سنيوره خطوا مكانها ورده في جمعة تورا بورا! بينا نصلى الضهر! وياك شايب؟ .. خش وياك شايب؟ .. خش واستهبل وقش! مين هنا واحد باله؟ دى الدنيا شبوره!

قرب قرب قرب مولد انتخابات فرقع بمب وجرب دی لعبة حسابات

أدى واحد علماني من قلبه الجواني بيقولي حريه على ديموقراطيه وانا عايز أنبوبه علشان التقليدا وآدى واحد فلول مش واقف معدول نيرانه لسعاني ولسانه معسول الأول ماسُوني! مش فاهم كلامه ولا شايف تهاويمه ولا حاسس أوهامه بس بيعجبوني! والتاني لو انتخبه حاخد منه موبایل صينى باناسونى!

قرب قرب قرب مولد انتخابات فرقع بمب وجرب دی لعبة حسابات

(4) تهتك ونزيف بالعينين

لكل عين حارس واقف عليها أمين وظيفته يحميها من التلطيش لكن يا صياد العيون يا لعين إزاى حيحميها من الخراطيش؟ صياد عيون ندل ووضيع الطبع وكأنه في رجل الجبابره مداس خرطوشه يفرش يقتل الحراس وكأنهم كتاكيت نهشها الضبع

مين اللى إيده تطاوعه يضرب نار؟ على عيون الثوره والثوار غير شخص قلبه ضرير ما فهمش إن اللى عيونهم مضيئة بألف شمس نهار عايزينه يبقي زيهم فى الوطن واحد من الأحرار

(5) قطع ف اللسان وودن مقروصة

خالد علاء عبد الفتاح نونو بيرضع نور وكفاح دموعد فيها ريحة غاز وبسمته تحل الألغاز

فى بطن مامته ف ماسبيرو سمع وشاهد بضميره كورس من الشهداء طايرين وملايكه بيغنوا ترانيم صلوات كنايسى مالها مثيل ريحة بخور فاحت م النيل ناس من خشوعها بكت تماثيل وناس قلوبها حجر طواحين

روح مینا دانیال طایره بعید حاضناها روح خالد سعید بیدردشوا زی الأصحاب و اخدین مواعید

صريخ ودهس وضرب رصاص وغنا ملايكه وصوت أجراس دى صلاه جناز على كل شهيد ولا لإبن الثوره يا ناس. كانت صلاة فرحه وتعميد؟ خالد علاء عبد الفتاح نونو بيرضع نور وكفاح ياما سجون حُبلى ف أحرار وعروش بتولد حمل سفاح

(6) رصاصة ف القلب

الشيخ عماد الدين قائد كتيبة ثورة الأزهر زى الأسد ف الحق يا مؤمن شايل كتاب الله في قلبه بينور لافف عليه وطنه وجع مُزمن ف الحق مُتهور وف الحريد وبيرمى نفسه رمح للجهاديه ويحارب الضالين بلا انتهازيه راجل يقول فتواه ف عين الغول «صوتك أمانه ولا يجوز شرعاً لأى فلول» ما يهمهوش تهديد جيوش أحفاد تتر ومغول الشيخ عماد الدين دا جرح صاب القلب في مقتل يا أزهر البساتين يا أجمل الشجعان صورتك شايلها إلى الأبد ميدان بيخلى وياك الوطن. أجمل

(7) سحجات ورضوض عليها بصمات الجاني

علی فکرہ یا سادہ سحل البنات يشبه لعاده.. اسمها وأد البنات فيه ناس غرضهم إنها ترجع والوأد يبقى تحت خيمه قماش أو يبقى ف ظلام البيوت خفاش بيؤدى طقس عباده! وناس كمان بيعملوه ببلاش بالسحق تحت بياده مش زى غُزل البنات! الأولاني .. بيحاول يدوّبهم على الأسفلت والتاني .. بيدوب حلاوته ف بقك وما بتشبعش منه مهما أكلت! وتلاقى حاجه من جواك بتزقك إذا أهملت علشان تحب الحياه خلينا نرجع للموضوع

دا تقرير طب شرعى ولكن مش ممنوع إننا نشرح فيه للشعب إن الجانى سحل أكياس غزل البنات وطحنها على الأسفلت بكعب البياده لكن لغباوته اللى فوق العاده ما فهمش إن البنات مع إنهم أجمل وأحلى حلويات لكنهم وقت الثبات أجدع من الشنبات أجدع من الشنبات اللى بتخفى خزيها وعارها في بطن أتخن دبابات!

(8) آثار دهس على الساقين والرقبة

السنادى الكريسماس عدت عليه المدرعات كل حاجه اتبططت تحت العجل يا حضرات شجره عليها الزينه متبططه ومهروسه وتحتها شفايف.. كانت بتبعت بوسة ونجمه فوقها حزينة متبططه ونورها كمان متبطط مدايا بابا نويل الأحمر المخطط متعلق على الشجره ومتفلطح كأنه لسه خارج من تحت إيد المكوجى

أسر بحالها أب وأم مع أولاد جد وجده مع أحفاد تحت الشجر المبطط متبططين وضمير الأغلبيد اللي اتهرس من سنين على رجاء القيامه أخد حبوب النوم ورقد ف غيبوبد تامه

ملحوظه هامه:

«دا مش مشهد هزلی
من فیلم کارتون
لکن هم أزلی
فی واقع ملعون»
کریسماس السنادی
عدت علیه المدرعات
وتماثیل العائله المقدسه
کانوا ف قلب المدهسه
واقفین مبلمین
بیبصوا لبعض مش مصدقین

وفى نهاية التقرير احب اقول لك لسه عندى جثث كتير بعضها مجهول وملامحه مطموسه وحالها متبهدل على الآخر وبعضها لقيناه مرمى على تلال الزباله ويصعب على الكافر لكن يا سيد ألفين واتناشر قبل ما تستلم جثة أخوك لازم تمضى إسمك بحروف وبأرقام وتجيب معاك اتنين موظفين يضمنوك بعدها تتفضل وتاخدها بسلام بس یاریت بعد اتناشر شهر نلاقيك ميت ف سريرك موته طبيعيه ربانيه بعد ما تتحقق وياك كل الأحلام فى العدل وف الحريد.

جريدة التحرير 1 يناير 2012

آخر ملوك الطوائف(×)

آخر ملوك الأندلس أدلى بحديث مسموع قال للمذيعه يا ريت مُلكى يعود أسبوع أنا كنت احقق ف البلاد العدل والمساواه ولا اخلى ناقد تشتكى سوء بختها لله وأخلى سيف القانون لامع كسهم البرق ينزل على الملعون ، على مستغل الخلق وبكى بدمع ذليل وقال بقلب تعيس: أنا اللى ضاع مند الوطن ف العُهر والتهليس

آخر ملوك الأندلس أدلى بحديث مكتوب قال لو عرفت مصيري كنت جايز اتوب أو كان نصحنى وزيرى وقلبى بات مرعوب ما كانش بان تقصيري في شئون الحكم اللى رميتها لعصابة عُور وصُم وبُكم ولا كان يبات ف المملكه مظلوم ولا جوعان ولا كنت اسيب الشجر عريان بلون بهتان بس الندم يا للأسف توأم لكل مهان آخر ملوك الطوائف ع الهوا مذلول كوم دنانيره اللي سارقها ف تل مهول وقعد مدلدل عليها يندب اللي جناه ومد إيده بيشحت عطف من رعاياه كان عنده فرصد يآخى ما بين هلال وصليب لكنه ساوى المظلومين على مكنة التعذيب اللى يعارض فيه.. بيلبسه الخوازيق وينام على أغانيد.. وكأنه طفل برىء يهشكوه ف المهد يحلم بعرش المجد

اللى ارتفع صقر هايم وحده ف الملكوت جده اللي كان النصاري ف زمنه بيحبوه إيده طهوره ووقت الحق يسجن ابوه طالع لمين انت عديم الإنسانيد كئيب؟ أسلافك الموتى ينادولك ف بهو القصر متعلقين بحبالك الدايبه... متسلسلين بالقهر لابسين دروع كالحد ومصديد وكأنهم أشباح من الفرسان ف دورية هجروا ظلام النعش الريح تمرجح في سلاسلهم وسيوفهم التلماند ما بتلمعش واقفین ف صف مهیب وعيون جماجمهم تبص عليك تهمس بحزن رهیب:

ونسى وصية جده اللي طواه الموت

ضيّعت تاج المملكه ف الهلس والأكاذيب ودا مش غریب على طفل متربى ف إيوان الحريم راضع حليب.. جاريه خُلاسيه وأمد طول لياليها مرمية تستحلب المتعد الحرام في حضن عشاقها الغجر على فراش ملك البلاد والدك. سليل العز والأمجاد اللي وقع مشلول من فحش أخلاقها إنت ابن ابوك ولا ابن عشاقها؟! مش انت برضه اللي رميت الصولجان.. للقوادين وموامس الأسبان؟ علشان يهشوا ف المراعى بيه على الخرفان؟! وتختفى الأشباح ف جوف لياليك لكن نواحهم للأبد أصداءُه تلعن فيك: "يا حي مات واندفن خساره فيك الكفن!"

حانحكى إيه ولا إيه؟ أيام زمان في عز جبروتك كان الشيطان يركبك زى الفرس ف الريح ويلف بيك المملكه يقصف رقاب ويطيح واللى يعارضك تعمله عبره لرجال وشباب دلوقتى جيش فرناندو رابضلك على الأبواب خلى شيطانك ينفعك أصله البعيد كداب وسوس إليك تفترى وسابك كسير الناب سابك رهين الخوف معكوك ف ميت ذلة وفرناندو راح يأسرك .. بهلول لإيزابيلا

ويغنى صوت الشعب. مع كورس الأشباح:

ضيّعت تاج المملكة وضيّعتنا وياك يا هلترى لينا أمل فى حد تانى سواك؟ غير اللى بيسبل عينية، ويقول لنا: أهواك؟! واللى نيابُه بيلمعوا من حكة المسواك؟! إحنا اللى ضيعنا القرون نحلم بحاكم عدل وف مره يطلع مستبد.. وعشره يطلع ندل وكل واحد جالنا كان.. معيوب وفيه علة وفرناندو على مر الزمان بيلمكم فرحان بيلمكم فرحان بهاليل لإيزابيلا

الدستور الأصلى وجريدة العربي 15 يناير 2011

 ^(×) ملوك الطوائف هم الحكام الفاسدون لدويلات الأندلس التى اجتاحها جيش فرناندو ملك أرجوان، وزوجته إيزابيلا ملكة قشتالة.. كسكين فى قالب زبد.

الكتالوج

كل الطغاه بيقاوموا الموج ولا حد فيهم فهم الدرس بغباء بيمشوا على الكتالوج فاكرين حيطفوا نور الشمس فاكرين حيطفوا نور الشمس

بينفذوا التعاليم بالحرف قبل الغرق تحت الطوفان بيقولوا هنا مش نفس الظرف وفيه اختلاف بين الأوطان!

ولما تنفجر الثورات يطلعوا الكتالوج م الدرج . يتلخفنوا زى الحشرات ويستخبوا فوق ف البرج

ويطبقوا كل الخطوات بغباء غريب وبكل عناد نفس الحماقه ف الجينات ف كتاب طبائع الاستبداد!

واحد. حنضرب باستعباط بعقل متحجر مقفول وبعدها برصاص مطاط واهى شده ومسيرها حتزول

وبعده نضرب ف المليان والثوره ف الشارع بتزيد ونقرا ف الكتالوج بأمان الشر لسد بره بعيد!

اتنين ـ بلاش الإنترنت من غيرها عقل الناس حيشت ونقطع الميه كام يوم ريحة هدومهم تبقى "شِت"! وكمان حنقطع المحمول نعمل محاوله لنشر الخوف نطلق رصاص حى ومولوتوف وبلطجيه راكبه خيول بعدين نبرطم أى كلام في كل قنوات الإعلام في كل قنوات الإعلام والثوره ف الشارع حتزيد لكن حنرجع للكتالوج والشر لسه بره بعيد

تلاته ـ تليفزيون مفضوح وتنازلات بطلوع الروح هروب جماعى للمساجين وإنفلات أمنى يا مساكين حتعملوا إيه يا مواطنين؟

"نعمل لجان شعبيه بجد والفوضى يتحطلها حد والثوره ف الشارع حتزيد ولما ترجع للكتالوج تخدع ف نفسك يا مسطول حتقرا فيه وانت مبلول وتقول لنفسك وسط الموج الشر بزضه لسه بعيد!"

وأربعه. عصابتك وياك تبعت فلوسنا المنهوبه ف بنوك سويسرا تستناك إلهى تدخل غيبوبة دا اللى يشوفك وانت زمان جايلنا لابس زنوبة عمره ما حيصدق يا مان إنك بقيت صاحب أملاك

وخمسه حنعيش من غيرك في خيرنا اللي ماهوش خيرك ونصدر الثوره لجيران حكامها عايشين باطمئنان طابقين على قلوب الجماهير ما بينزلوش ليهم من زور وإنت حتبعت الكتالوج لكل واحد م الأمامير الديكتاتورات الدكاتير زمايلك اللي عليها الدور!

جريدة الدستور الأصلى 20 فبراير 2011

تعويذة ملك الشام

تحية إلى المطرب الشهيد إبراهيم قاشوش والرسام المناضل على فرزات

فى قصر ملك الشام عاكف على التعاوية ساحر خسيس لابساه سحنة شيطان يا حفيظ واقف ف قلب الليل برجل حافر خيل والتانية رجل معيز ماسك كتاب مخطوط إيده الشمال شايلاه ف القبو كان محطوط من عهد شاهنشاه

قدامه فوق النار طاجن من الفخار مخصوص لحفل عشاء القائد المغوار جواه بيغلى حساء بجماجم الشهداء مع ألف صنف بهار وضفر قرد يتيم ورمش سبع لثيم وصباع لرسام حر وصباع لرسام حر رسومه سيف بتار وحنجرة مطرب بيغنى للأحرار

تعویذه ملعونه
الساحر الغدار
لقاها مدفونه
فی داره تحت جدار
عنده أمل تحمیه
وتداری علی بلاویه
بس التاریخ بیقول
النصر للثوار

جريدة التحرير - أغسطس 2011

حواربين أسدين كوبرى قصر النيل

طفله بتضحك في بلكونة بيتها ف ميدان التحرير وأسود قصر النيل مذهولة قاعدين يحكوا ألف بطولة قام بيها كل الجماهير

واحد منهم بص عليها
وقال لزميله سؤال بزئير:
حاجه غريبه بجد كتير
دى شقه طول عمرها مقفوله؟
من بعد تلاته وسبعين
دايماً نورها مطفى وضلمه
وعمرى ما شفت بنات حلوين
من شبابيكها علينا تطل
دلوقتى البلكونه بتلمع
والشيش مغسول زى الفل!
رد زميله بضحكه وشاور
لشباب فوق عواميد النور
شايلين العلم المسحور

قال: إفتح مخك وافهمني طول عمر البنت دي موجوده بس انت اللي ماكنتش شايف كنت مغمض عينك خايف طول عمرك يا صاحبي مبلم ومصدر ضهرك للنيل دلوقتى بقينا بنتكلم من بعد ما كنا تماثيل علشان الروح دبت فينا وبقينا قطاقيط قطقوطه وعيوننا بتلمع مبسوطه وشنباتنا لها شكل جميل وبتمسح على وشنا فوطه مبلوله بعطر الجماهير ف إيدين بنوته كتكوته كانت واقفنه في بلكونة بيتها ف ميدان التحرير

الدستور الأصلى - مارس 2011

على كل وش كتاب مفتوح

على كل صفحات الأخبار اللي اتملت سنوات بالعار صوره لبطل صامد بيزُك في جبهته وعلى حده دماء بيغنى لشباب الفيس بوك أوبرا لأرواح الشهداء

شهداء بلادی ف الجرنان أسامی نورها يرد الروح كريستيان .. سالی زهران وف كل وش كتاب مفتوح

على كل جبهه وخد وسام من شاش وقطن وصبغة يود معجون بدم على أحلام تكوى وتحرق قلب حسود

وتحت أسماء الشهداء حبر المطابع كان مكسوف بيلطخ اللى ما عنده حياء واللى ما يشترى يبجى يشوف

صوره لكلب بيحضن اقطا ويمد إيده باستجداء المركب الغرقان بينط م المركب الغرقان بينط عشمان ف لحسة الأي حذاء

الثوره عارفه مين بيّاع وعارفه مين هما الأعداء وعارفه مين هما الأعداء اللي ف جيبه ألف قناع واللي ف سرايته ألف رداء

على تحل صفحات الأخبار اللى الملت سنوات بالعار صوره لبطل صامد بيزُك في جبهته وعلى خده دماء بيغنى لشباب الفيسبوك أوبرا لأرواح الشهداء

فبراير 2011

غنوة الحربايه عن المتلونين الذين يتنكرون في ثياب الثوار

أنا حربايد ناقصه ربايد على كل الألوان باتغير

من تلوینی راح تلاقینی مش باینه وعقلك یتحیر شوف القُدره فوق الخُضره إخضريت من وقت صغير

> فوق المكتب شفتنى بالعب تحتى ورقد عليها كتابد

> > باعمل نفسی زیها واکسی جلدی بکتابه کدابه

قلت دى بانت بعد ما كانت معد ما كانت حمرا بلون أزهار الغابه

الحرباية ناقصد رباية وفاكره الناس أغبيا وغلابه

> بكل سذاجة بتعمل حاجة بتزود سحنتها كآبه

مجلة قطر الندي مارس 2011

قصيدة اعتذار للدب القطبي

یا ثوره انفجرت فی ینایر یوم خمسه وعشرین مش عارف أوفیکی ازای حقك م الشكر أنا واحد م الشعرا اللی كتبوا قصاید یأس عن أوطان وشعوب مالهاش مستقبل لكن عایشین علی مجد الأمس أجیال مقهوره ما قدامهاش غیر إنها تتباع علی عربیات روبابیکیا وبس وكنت باشوف مع أولادی ف حدیقة حیوان الجیزه الدب القطبی المسكین اللی فروته كان لونها أنصع م القطن متابكه منفوشه متوسخه منكوشه

وهو مرمى فوق لوح التلج المكسور متفرهد ومسورق ف الحر ومقهور مستكفى إنه بيحلم فى لحظه وجيزه باللون الأبيض والسقعه وسجاده جليديه لا نهائيه.. وزى الفل ومفروشه فى كل مكان حواليه ع البحر وع البر لكن بيفوق على واقع مؤلم وحزين إنه حيموت ف الغربه فوق الطين ف بلاد شمس وحر ف حديقه حراسها بتستمتع بالشر ف بلاد ما فيهاش أى حقوق للإنسان ف بلاد ما فيهاش أى حقوق للإنسان يبقى ازاى حيكون فيها حقوق للدب؟

متشكر جداً جداً يا ثورة خمسه وعشرين دلوقتى بقيت مؤمن إن الشعب اللى اتحرر بالدم عمره ما حيرضى تانى بالهم علشان من حقد ف أيامه الجايين يتعامل زى البنى آدمين ويعلم أولاده ف مدارس فيها حريه لعقل الإنسان ما فيهاش قهر بسبب النوع والدين فيها أقسام شرطه بتنصر شخص بساريا وغلبان تديله حقد لما يحاول يبلعه واحد م الحيتان بصراحه أنا أكتر من كدا بكتير طمعان يا رب تحقق حلم أبويا جاهين يا رب تحقق حلم أبويا جاهين اللى اتمنى تماثيل ع الترعه وأوبرا للفلاحين أنا باحلم بقى ببلاد ما فيهاش أصلاً جوع ولا فقر أنا باحلم بقى ببلاد ما فيهاش أصلاً جوع ولا فقر

فيها أصحاب الموهبد والإنسانيد هما الحكام فيها الخيل فرحان بيجر العربيات اللي راكب فيها أطفال سعداء داير بيفسحهم من غير ماحد يسوقه بكرباج ولجام يا رب نشوفها حقيقه وما تبقاش بس مجرد أحلام نصحى منها من تاني على عين حمرا وتكشيرة من واحد على كتفه دبوره متغاظه بتزن أو واحد عايش مع كتبد الصفرا ف جزيرة وبيحل مشاكله بملايكه وجن لكن برضه ولو الثوره اللي عبيرها مشعشع ف الجو بتقولى ما يهمكش التخويف بالماضى كله مجرد بكش عمر التاريخ ما بيمشى بضهره للخلف والشعب اللي اتحرر بالدم مش ممكن أبداً يرضى تانى بالهم

والدب القطبى صديقى اللى عايش ف حديقة حيوان بصراحه هو كمان لازم يبقاله كرامه زى الإنسان ويعيش ف تكييف وقزاز مفروش من تحته جليد أنا عارف طبعاً إننامش حنعوضه عن وطنه بالتأكيد وحياته اللى ف قطب شمالى بعيد لكن دى أبسط حاجه ممكن نعملها له علشان لما يلاقى قدام عينه الذكرى اللى عايشه ف خياله يبقى بعد الثوره.. سعيد

جريدة التحرير 10 أغسطس 2011

حكاية كلب القطيع

كلب القطيع
ما بقاش مطيع
كتر الدلع والنوم ف ضل السور
خلاه بقى مغرور
يوم بعد يوم، وخريف يجر ربيع
لقيناه بقى مسعور!
ما بقاش يبات سهران طوال الليل
بيحرس الغنمات
بقلب كله ثبات
دلوقتى بيهب بنداله ف وش أطفال النعاج
ويعض فيهم زى ديب مُهتاج

كلب القطيع
أول ما جالنا كان جعان وهزيل
لكنه كان شهم وجرىء وجسور
يا هلترى الموضوع
هو الشبع.. من بعد جوع؟
مأمأ خروف
بكل خوف
وسأل زمايله ف المرعى بصوت مذعور:
أنا نفسى أفهم بس ليه يا ترى؟
الحارس اللى وظيفته يحمينا
نازل علينا عضعضه وزمجرة؟
نازل علينا عضعضه وزمجرة؟

العيب على الراعى
الازم يكون واعى
وعلينا يبقى غيور
ولما كلبه يتقلب مسعور
يلبِّسه كمامه
وياخده من إيده على الدكتور
ولو علاجه فشل يا عم خروف
غيره كلاب ياما
وغيرها ياما ألوف
تتمنى فى ليل الشتا
ونغزل لها من فرونا ..
كوفيه صوف

جريدة التحرير - يوليو 2011

فارس سلاح الفرشاه! إلى حجازى.. عبقرى الكاريكاتير الراحل

أنا فارس ف سلاح الفرشاه! أنا مبدع ف سلاح الفرسان وجنودى.. أنابيب الألوان قدامى طوابير زى مشاه بيضحوا بأرواحهم علشان الفن وتفانين الفنان

بصوابعی باحضنهم بتفانی

یتنططوا ف بالتة ألوانی

بالفرشه ألخبطهم من تانی

أرواحهم تتنطور علی لوحتی

ف مناظر عجباکو وعجبانی

رسوماتی ملیانه تفانین و تنابله صبیان نعسانین و تنابله سلطان لکن یاااه ف کسلهم وعسلهم نایمین وصوابعی بتسیل منها حیاه أنا فارس وسلاحی الفرشاه

ف «صباح الخير» كداع المكشوف فرشاتى ياما بارزت ف سيوف ف حروبى اللى انا بيها معروف ف «جروبى ف الفيسبوك» حتشوف تنكيت على تبكيت على معاناه أنا مبدع ف سلاح الفرسان أنا فارس ف سلاح الفرشاه.

أنا فارس ومفكر وهمام ومفجر تهريج على ألغام أنا سيد درويش الرسام وحجازى اللي بيرسم .. أنغام

جريدة التحرير - أكتوبر 2011

لمبه سهارى إلى صديقى إبراهيم أصلان

جواهرجى شايله أدراجُه حكايات وأسرارها حتعيش «باولو كويلو» و»ساراماجو» بيخطفوا منها تناتيش!

حكايات عن «العصافير والنيل» متستفد جوّا الأرشيف في قلبد كان بيشيلها دليل «مالك حزين» وجميل وشريف

سابق لعصره وأوانه شكله لاتينو أمريكانو لكنه مصرى ف بنيانه واللى ف على لسانه واللى ف قلبه على لسانه

طيّب وكامل الأوصاف يكتب بلغة التلغراف أدبُه عنى وف الكلمه بخيل أدبُه عنى وف الكلمه بخيل تلميذ «لصاحب القنديل»

نقطة كلام منه قنطار جد وخيال، حزن على هزار صنايعي إحساسه جبار صادق ومالهوش ف التمثيل

عايش ف مطرح ف الكيت كات «أوضتين وصالة» ولكن إيه يساعوا م الأحباب ألوفات من وسعهم فشر «الإليزيه»!

على سحابه ف السماوات تشبه سرادق لتعازى قاعد يوزع الابتسامات مع خيرى شلبى وحجازى ويرمى نكته عن الموتى اللي يخافوا ظلام القبر «ديّتها لمبه.. بلاش خوته! ونسيبها قايده أوّل شهر»!

وانا تحت باسمع وباداری دمعی اللی حابسه وحابسنی یا صدیق یا لمبه سهاری ف القلب نورها یونسنی

نورها حيفضل للأحباب محمود وليلى وكل شباب بلدى اللى ثورتها حتتصان في دفء حضنك يا أصلان

كلنا أقباط كنيا أقباط كتبت في رأس سنة 2011 - ليلة تفجير كنيسة القديسين

فى جنوب الوادى والدلتا وعلى شط البحر مسلم ومسيحى كلنا أقباط مصريين مهما اختلف الدين عندنا نفس السحنه عايشين نفس المجنه طابق على قلبنا نفس الهم لما بنتعور بيسيل مننا نفس الدم

واقفين مع بعض ف ذل ف نفس طابور العيش وبنلبس نفس البدله الكاكى ونستشهد بيها ف الجيش واللي بيسرق صوتى وصوتك ما يهموش موتى وموتك ولا يفرق أبداً وياه عبد الرحمن من عبد اللاه والفاجر اللي بيدى لنفسه الجق إند يفجر ديناميت ف الخلق اللي بتعبد ربنا

فاكر إنه يقدر بمزاجه يحدد لنا
ويقول جرجس حيموت وحسن لأ
علشان كدا يا مصريين
كلنا يوم سته يناير حنصلى ف كنايس مصر
ف جنوب الوادى والدلتا وعلى شط البحر
من بنها لدمياط
جرجا للفسطاط
وحوارى شبرا ودخانيق العياط
كلنا مسلم ومسيحى حنصلى ف كنايس مصر
علشان كلنا أقباط

الدستور الأصلى 2 يناير2011

كلمة السر كتبت رداً على جريمة إغلاق جريدة الدستور

من غير إحم من غير دستور الجانى حرق القطر ونط من كوبرى مصر وقع مكسور حيموت هناك غرقان ع الشط والمخرج اللى رسمله الدور حيدوسه قطرنا آخر الخط

جدى محمد بك عثمان اللى اتنفى مع سعد زمان زارنى ف منامى وكان قرفان قالى المبادئ والأوطان ف زمانكو ده بأبخس أتمان ودس إيده ف القفطان إدانى قرش عليه سلطان

صحیت ف إیدی قرش قدیم صالح لأى زمان ومكان بيطل منه وجد لئيم يشبه لتعلب أو تعبان تحته عباره بخط فخيم: سلطان محب الناس ولهان! بصیت لقیته ناوی یعُض صباعی زی دیب هباش رميته من إيدي على الأرض يغور ف داهيه ما يلزمناش كان ناقص ان القرش يرد: مفيش ملك إلا وبكاش إحنا الملوك أسامينا تخض علشان بنورثها ببلاش!

نمت وكأنى جبل واتهد وشفت جوز ملاعين ف كابوس عاملين مظاهره وجذب وشد بيمثلوا أوبريت مفقوس في وحده مش وطنيد بجد.. دى معاهده بين سلطان وفلوس جواسيس بتهتف يحيا سعد والوفد ينخر قلبد السوس

إتغظى بالضلمه يا عريان واطفى فانوس بيشع النور مهما تخبى إيديك حتبان دماء قتيلك المغدور تغسلها فين وازاى يا جبان؟ ما يكفيهاش أنهار وبحور

مشیت ف بلدی کأنی غریب شفت الأفیش علی کل جدار السیما فیها فیلم کئیب فی عرض دایم باستمرار أبطاله عواجیز علی کراکیب والفیلم إسمه حبك نار! معظمه مات وانهار مع إن معظمه مات وانهار عالکرسی یحلم فرجُه قریب والشاشه کلها بوس وهزار!

خرجت من حاره لحاره ولقيت دموعي خلاص حتفر ولقيت دموعي خلاص حتفر إفرح يا «عيسي» دى بشارة روح البلد مخنوقه ف شبر خرتيت مغفل بجدارة برطع على الأوزاق والحبر رسم زوابع جبارة تكتب نهايته ف كلمة سر

الدستور الأصلى - 30 أكتوبر 2010

حوار

- أنا صوت واثق بتقوله شفايف هاديه بتتهامس - وانا صوت زاعق بيقول ان العالم كله طابور خامس!
- أنا ممكن أتناقش مع غيرى ويطلع رأيه صواب وانا بافهم سيكولوجى وسوسيولوجى وديناميكا حراريه وطبيعه نوويه من غير ما افتح فيهم أى كتاب!
 - الناس كلها ليها حقوق متساويد وعليها نفس الواجبات
 - الحق ف قلبى لوحدى والناس التانيه تحتى بدرجات!
 - لو عندى مشكله بادى العيش للخبار واستفتى أهل الخبرة
 - أعقد مشكله باسمع فيها رأى الشيخ والبابا والحاخام في أي تخصص م الصاروخ للإبره!

- المحكمه كلمتها فوق الكل ورأى الغير باحترمه حتى لو مش مقنع ليّا - رأيى حيمشى على رقبة كل الناس واللى مش عاجبه بالفتوى حاطنه ومالوش ديّة! - أعيادى بافرح بيها وعمرى ما بازعل من أعياد الناس التانيين - أعيادى أفراح للبشريه وأعيادهم أفراح للشياطين! - أنا عايز اعيش مع غيرى ف دوله مدنية - وانا لازم أحكم كل الناس بالدين!

الدستور الأصلى - 5 مايو 2011

محكمه تحية إلى الأولتراس الأحرار وشهدائهم الأبرار

فى محكمة التاريخ حتدور الأسئله إمتى؟ وازاى؟ وليه؟ وحتتكشف الحقيقه بطريقه مذهله والجانى بدمعه يغسل قدم المجنى عليه

ألبوم الثوره شايل ميت ألف ألف صوره فيهم تلقى الفوارس من أولتراس الكورة مليون شهيد وحارس واقفين بقلوب جسوره واقفين بقلوب جسوره

أحفاد عرابى باشا
لابسبن توب الشجاعة
اللى اتفصل عليهم
من ذات نفس القماشة
فى عينيهم عزم باين
وطلعتهم صبوحه
بص عليهم وعاين
حتلاقى شهم عاشق
فى ضهره سهم راشق
ووراه حتلاقى.. خاين
لابد وسط الجناين

بنظرته المفضوحة اللي ماليها الفجور والدم على إيديه ما تغسلهوش بحور حاند «خاير» بيد حان الأمانة في حرب مرج دابق وقبض تمن الخيانة دنانير تملا الخنادق دنانير تملا الخنادق

فى كل عصر خاين شايل ذنبه المشين خسيس وعزمه خاير ملعون ليوم الدين

وف محكمة التاريخ حتدور الأسئلة إمتى؟ وازاى؟ وليد؟ وحتتكشف الحقيقد بطريقد مذهلة والجانى بدمعه يغسل قدم المجنى عليه

والماتش حينتهى بالعار وبالتجريس وهزيمه مخجله للخاين الخسيس للخاين الخسيس اللي من جهله فاكر تمن الدماء رخيص جريدة التحرير - فبراير 2012

دبان على وش الوطن

مذيعه إسمها جيجي.. ناقصه ذكاء وجمال وخابور غرا استراتيجي .. إسمه عبد المال قاعد يدلدق فتاوى والنزيف شغال غلباوى عبد المال مبايع المماليك داير على القنوات توليع على تسليك بيقول على الشهداء عملاء وبياعين واللى بعيونهم ضحوا ف الميدان قابضين يا أغبى خلق الله مفيش شهيد حيبيع حياته باتنين باكو وعلبتين بلابيع إنت اللي بايع ضميرك ممسحد لجرابيع خيشه قديمه لسيوفهم إتهرت تلميع تمسح ف إيد؟ ولا إيد؟ الخيشد كلها دم وذنوب زبونك تدلدق هم ما يتلم على كل وش دماء والخيشه زادتهم غباوة أصلها داء باين ف سحنتهم

الفرصه جت للبلد من تضحيات شهداء أشرف شباب الوطن وبفقرهم نبلاء ضيعها نقص خيال وخبل على استهبال إنطق يا عبد المال قول للى كان التاريخ فاتحله أبوابه حياخده بالأحضان لكن جرى وسابه واختار مكاند بعيد في ركن أكل العيش وقال لنفسد: «بلاش مغامرات على طيش جلابية الأوطان بالرقعه نرفيها! دا عشر تلاف خياط وترزى هاص فيها أنا اللى فالح بقى ومطلوب أجيبله قماش؟! رداء جديد للوطن يحميه من الأوباش؟ يحميد من الإهانات ومن الشتا القاسي لكن مقاس الوطن مش جاى على مقاسى!»

وف ركن أكل العيش زحف ونام ف أمان سادد ودانه وضميره كأنه مش خزيان يا عم يا للى التاريخ إداك فرص بالهبل إوعى تكون فاكر ملناش ف غيرك أمل الشعب هو اللى باقى والجميع حيزول وحتما حياخد مكانه رغم أنف جهول ورغم ألف خابور غرا استراتيجى ومذيعه ناقصه ذكاوه واسمها جيجى الشعب واقف هناك على ناصية الميدان حيهش دبان الغباوه والعطن

جريدة التحرير - 30 نوفمبر 2011

إصحى.. ينزاح الكابوس

ما كانش ف الحسبان ولا كان على بالى القي الشيطان كسبان ف كابوس مخيف جالى نفخ ف وشى نار وقال بغل: اختار تبقى أسير لشاويش أو يركبك درويش؟ ورمى لفوق يا زين عمله لها رسمين عمله لها رسمين إتحفروا ع الوجهين بئس المصير لاتنين

هتفت وانا محتار: الثوره راحت فین؟ ونادیت علی جدّی ناخد سوا وندّی ویشرح لأنجالی

جدى أخد شفطه من قهوند الساده وسعب نفس دُخان يا أيها الساده من شيشة التفاح ومسح بكفه دمع يلسع كما الشطه من عينى فرّ وساح وقال بكل حنان

إصحى الكابوس ينزاح الثوره عطرها فاح مش زوبعه ف فنجان الثوره بكره جديد عمر انكتب لشهيد حيعيش ف ضحكة ناس بيهتفوا بحماس الثوره ف الميدان والشعب لسه. يريد والشعب لسه. يريد

أول يونيو 2012

عمروسسنى

• صدر له:

دواوين شعرية بالعامية المصرية هي:

-الولد الشايب، الهركز الهصرى العربي للنشر 1987م.

-عالم تاني، العيئة العامة لقصور الثقافة 2001م.

- في الوقت الضايح، الدار للنشر والتوزيع 2007م.

- حكاية ف لحكاية (للأطفال)، هيئة قصور الثقافة 2011م.

• روايتان:

-أسدعلى رف الدنيا، دار الثقافة الجديدة 1988م.

- تنفس صناعي، الدار للنشر والتوزيح 2010م.

- عضو نقابة الههندسين
 - عضو اتحاد الكتاب
 - عفيو نقابة العبحفيين
- رئيس تحرير مجلة قطر الندى للأطفال تصدر عن العيئة العامة لقصور الثقافة، وزارة الثقافة.

- قام بترجهة وتهمير حوار واغانى النسخ
 العربية للعشرات من أفلام لارتون
 - والت ديزني
- وشارك في كتابة الأغاني لبرنامج عالم
- وقام بكتابة أغانى أول فيلم كارتون عربى بعنوات الفارس والأميرة
- كتب القصائد والأغانى لأفلام تسجيلية حازت على جوائز مصرية وعالهية.
- صاحب أول تجربة لنشر قصة أسبوعية للأطفال في الصحافة المصرية بجريدة الأهرام خلال عامي
 - . 1981 9 1980

Serve 2

	تقرير الاديب الشرعي
7	للشعيدألفين وحداشر
39	آخر ملوك الطوائف (١)
47	الكتالوج
61	تعويزة ملك الشام
	حواربين أسدين
	كوبرى قصر النيل
73	على كل وش كتاب مفتوح
	غنوة الحربايه
89	قصيدة إعتزار للدب القطبي
	حكاية كلب القطيع
	فارس سلاح الفرشاه!
	لهبه سقّاری
115	كلنا أقباط
121	كلهة سر
_	حوار
131	محکیه
137	دبان على وش الوطن
143	إصحى ينزاح الكابوس

شركة الأهل للطباعة والنشر (مورافيتلى سابقاً) ت، 23952496 - 23904096

السنادى الكريسماس عدت عليه المدرعات كل حاجه اتبططت تحت العجل يا حضرات شجره عليها الزينه.. متبططه ومهروسه وتحتها شفايف كانت بتبعت بوسه ونجمه فوقها حزينه.. متبططه ونورها كمان متبطط شراب هدايا بابا نويل الأحمر المخطط متعلق على الشجره.. متعلق على الشجره.. ومتفلطح كأنه لسه خارج من تحت إيد المكوجي أسر بحالها.. أب وأم مع أولاد.. جد وجده مع أحفاد تحت الشجر المبطط متبططين تحت الشجر المبطط متبططين أخد حبوب النوم ورقد ف غيبوبه تامه



وزارة الثقافة



www.gocp.gov.eg
www.atlas.gov.eg
www.gocp.gov.eg/Trikafa
www.misrelmahrosa.gov.eg
www.studiesresearch.gov.eg
www.masrahna.gov.eg

الثمن: جنيهان